

Lamento BORGO CANPOSANPIERO 2023

A passo fermo e ocio sincero,
Eco riva Borgo CANPOSANPIERO!
Dopo ani che par forza manchemo
par seguro longa sarà la nostra lista
e contarvela tuta no ghe la faremo!
Strada messa in sicuressa? mai vista!
Segnaletica, lanpejanti o dissuasori,
partir da San Dono manca fin a le tori.
A l'uscita de la Cerva so la provinciale,
come da la Valsugana, senpre tale e quale.
No parlemo de la torta che ciamè rotonda,
quela ne la Valsugana, là da i Bassei,
nissun che par sto spegasso me risponda?..
No ve mancarà mia oncora i skeli??!!
Finalmente, e de questo va rengrassia,
pal lavoro fato al Bigolo, dal Capitelo,
zontandoghe drio anca, cordonate e marciapiè
che in zona Bonaroti xè 'ndà sistemà.
Ma ne la Cerva, che i core come a Monza,
infrà stretoie, salti e buse, nessuna speranza!?
Cari sti paroni, ghemo tanta pasienza,
però no steme tirar a cimento
ché, se la corda se rompe, vien fora
de seguro on gran rabaltamento
che mai visto se gà finora!
La nota nostra de lamenti saria tanto pì dura,
ma qua se fermemo pa no farve vegner paura!
Partindo da sta piassa se femo i auguri
vardandose tuti co cuore fraterno.
Primo par i lavori: diventàseli sicuri,
e 'na man ghe meta sto novo governo.
Pase! disemo, e oncora sighemo PASE
Tirandoghe le rece al mondo che tase.
Fasemose forsa, invochemo l'Eterno
che toca le teste, scaldando i cuori,
portandome fora da sto bruto inverno!
De la guera che 'l stua i tristi rumori.
Questa xè la speranza, l'augurio vero
Che porta 'l BORGO CANPOSANPIERO!
27/12/2022 Adino Libralato

BORGO MIRAN

Quietì, senza tanto bacàn
se presenta 'l BORGO MIRAN!!!!
Senpre manco, desso, se resta,
ma i mejosemo de la coada
co la peste che me gà fato la festa.
Largo, donca, a noialtri, fasime strada.
PASE! disemo, e oncora, sighemo PASE
tirandoghe le rece al mondo che tase.

A voialtridomandemo, par la fabrica del Vivo,
se podaria vedareon piano definitivo?
So le nostre cale che taja par Treviso,
tuti parchegiasensa on verso preciso,
tanto che ormai senprepèzo se passa:
gavio on piano, on progeto, 'na strassa?
Par comunicare da via Tigli al Lando,
Se va vanti solo senpre parlando?
Saria l'ora de mesurar la volontà vostra,
sistemèmequalcossa, almanco par mostra!
La nota nostra de lamenti saria tanto pì dura,
ma qua se fermemopa nofarve paura!
Se pol ripartire co qualche speransa
che de tute ste robe no saremo oncorasensa?
Basta, i tosati gàfredo, le tose se ingiassa!
Xè tardi, 'l poco dito saria anca massa!
Co saludi sinceri, drio la nostra usansa,
co auguri caldi, pochi ma veri
che i tenpi novi sipiamejo de jèri!
Sigando EVVIVA, batìforte le man
Sfila desso 'l BORGO MIRAN!
Noale, 29/12/2022 Adino Libralato

Lamento BORGO MESTRE per Pirola Parola 2023

Co finisse tute le feste,
riva in piassa 'l BORGO MESTREeee!
Co on sacco de lagnanze e cavatele
che ogni ano vien pì bele.
Parchè nissuno se la ciapa a male,
tute le diremo, ma in confessionale!...
tanto, le conosse tuta Noale.
De 'sto paese messo in Crose,
no saria ora de scoltare la vose?
Semo tornai solo par questo,
ma dève da fare e a farlo presto!!!
le nostre lagnanze, sincere e oneste,
gà da essar tolte in considerassion!
Se a noialtri le me gà guastà le feste,
che a voialtri le daga preoccupassion!
Come senpre, in bona armonia,
anca st'ano che la vaga finia
De auguri, vin portemo on çesto!
Pase, bontà, salute e tuto 'l resto.
Che Dio me tegna fin che semo boni!
Basoti e struconi, strucoti e basoni
che finissa sta gran peste!
Eco l'augurio de Borgo MESTRE!
28/12/2022 Adino Libralato

Borgo PADOVA Lamento 2023

BORGO PADOVA? ECOLO QUA!!!

Sensa che se la contemo par 'na settimana,
scoltè ben cossa ve disemo noialtri da Briana:

ve gavì sistemà, co le nostre tasse

voialtri, a Noale, tute le piasse.

Gavio vanzà gnente pa sistemar le Vale?

Par la Fornasa, tuta 'na busa,

tirarò fora n'antra scusa?

De 'sto paese inpiantà a Crose,

no saria ora de scoltare la vose?

Semo tornai solo par questo,

ma dève da fare e farlo presto!!!

De auguri, vin portemo on çesto!

Pase, bontà, salute e tuto 'l resto.

07/11/2022

Adino Libralato